

Louis GIRAUD

MANSOUR

à mi felen.

L. G.

La vido d'aqueste mounde n'es qu'un jo.
Lou Couran. Sourato 19, cap. 57.

Aguessias vist lou fube de mounde qu'anavon e venien dins lis androuno embouiouso que, coume de courado, s'esparpaiavon au cor de la medino en aquéu bèu jour de Diéu de l'an cènt cinquante tres de la Santo Fugido, dins la grand ciéuta de Bagdad, n'en sarias esta esbalausí. Cadun fasié si croumpo avans jour fali, d'abord que l'endeman èro un divèndre, e qu'aquest jour es sant.

La cridadisso di marchand, lou trigòssi di chaland, l'anaveni dóu mounde mescla au quila di mòssi em' au japa de la caniho, tout acò fasié 'n chafaret qu'es pas de dire que, pièi, s'envertouiavo dins la tubèio espesso di fricoutié que sentien lou pebre, lis astado roustido, lou móutoun grasiha emai li pebroun fèr.

Or, se vai devina que, dins la carriero de la lano, la boulegadisso èro dins soun plen, amor que lou toundage de la primo èro acaba. E, dins aquelo carriero, èro la boutigo de Maiedin, lou marchand de tapis, que li gènt se ié quichavon mai qu'en liò, estènt que durbissié la sesoun emé li milanto merço que la darriero caravano venié de l'adurre de Bassoura.

Dins aquelo boutigo, pichouteto, li paret èron tóuti cuberto de castroun de post ounte s'arregueiravon, plega, de tapis de touto meno, de touto usanço, de tóuti païs, despièi li meravího de Tabris, de Kirman, d'Isfir, de Chiras, d'Amadan emai de Boucara, sènsò parla di rougadou de Koula e de Tiblissi, de Chirouan, d'Ismir e de Sarouque, e li encaro dóu Souf e de Tenés teissu 'n péu de camèu, e tambèn li de Bessarabio afeciouna di vagant. Que siegue pèr prega, pèr adourna l'oustau o tapa lou sòu di tibanèu, que fuguessias paure vo catau, aqui destraucavias segur la besougno que vous fasié mestié.

Es pèr acò que Maiedin emé soun drole Mansour e si tres coumés bastavon pas pèr respondre à la demando di femo, autant coume dis ome, que se fasièn moustra lou blanc dóu porre de l'arribage. Lou radassié que fasié quási lou tour dóu mèmbe èro coumoul de gènt qu'estacavon lengo e discutissien di pres en bevènt de tasseto de tè. Dintre éli se devinavo li catau de la ciéuta, e se pouidié nouma de persounage dóu gros grun qu'èron de prince.

S'endevèn qu'à-n-un moumen un vièi Cheic s'avancè de Maiedin e ié venguè coume eicò:

— Siés bèn tu que sarcisses li tapis dóu Califat?

— O, diguè Maiedin.

— Brave! n'en veici un que te lou faudra sarci tras que bèn, amor que lou que me mando ié fau beisa lou sòu entre si pèd.